

ՍՏԵՓԱՆՑԱՆ ԼՈՒՍԻՆԵ

ԿՐԹԱԿԱՆ ԲԱՐԵՓՈԽՈՒՄՆԵՐԸ ՌԵՋԱ ՇԱՀ ՓԱՀԼԱՎԻԻ ԿԱՌԱՎԱՐՄԱՆ ՇՐՋԱՆՈՒՄ

Կրթված և բանիմաց բնակչության դաստիարակելը հասարակության շրջանում բարեփոխումներ անցկացնելու կարևորագույն գործոններից է:

Իրանում 20-րդ դարի սկզբներին՝ Փահլավիների դինաստիայի հաստատման ժամանակաշրջանում, բնակչության մեծ մասն անգրագետ էր, և այդ խնդրի հաղթահարումը դարձել էր անհետաձգելի անհրաժեշտություն: Ռեզա շահ Փահլավին բավարար կրթություն չէր ստացել, սակայն խորապես գիտակցում էր դրա արժեքը՝ կարևորելով այն որպես «ազգի երիտասարդներին և մեծահասակներին միատարրության, արդիականացման և ազգայնացման ներշնչման միջոց»: Դրանում նա տեսնում էր այն գործիքը, որի օգնությամբ կարելի էր պայքարել սնանկավատության, հետամնացության դեմ և դաստիարակել միասնական ժամանակակից ազգ»¹:

Ռեզա շահի կառավարման շրջանում կատարված բարեփոխումների մասին ամփոփ կարծիք կարելի է կազմել՝ «Փննարկելով թագավորության 16 տարիների ընթացքում նրա վարած քաղաքականությունը, կիրառած մեթոդները, սակայն նաև՝ հաշվի առնելով նրա գործունեությունը ոգեշնչող պատճառները և պայմանները: Միգուցե, դրանք կարելի է ընդհանրացնել մեկ նախադասությամբ. նա ցանկանում էր տեսնել Իրանն անկախ, հարգված այլ ազգերի կողմից, նա ցանկանում էր, որ Իրանն ինքը վարի իր արտաքին քաղաքականությունը, առանց որևիցե այլ կողմի ուղղություն ցույց տալու կամ հովանավորության, ուզում էր տեսնել Իրանը հզոր ոչ թե կայսրության հզորությամբ, այլ բնական, մարդկային և բարոյական ռեսուրսների հարստությամբ: Մա էր նրա՝ ազգայնականության պատկերացումը»²:

Ռեզա շահի քաղաքականությունը որոշ չափով կրում էր Թուրքիայի առաջնորդ Քեմալ Աթաթուրքի քաղաքականության ազդեցությունը, որի հետ նա հանդիպում է ունեցել 1934թ. Անկարայում³: Մակայն Ռեզա շահի բարեփոխումները ավելի չափավոր էին, քանի որ նրա խնդիրը բավականին բարդ էր. Թուրքիան ավելի սերտ կապեր ուներ Արևմուտքի հետ և

ավելի պատրաստ էր՝ ընդունելու բարեփոխումներ: Բացի այդ, Ռեզա շահը չէր կարող կտրուկ կերպով ընդդիմանալ հոգևորականությանը, հատկապես՝ տեսնելով, որ իր հարևան Աֆղանստանի թագավոր Ամանուլլահը գրկվել էր գահից կտրուկ բարեփոխումների պատճառով⁴: Այդուհանդերձ Իրանն արևմտականացնելու՝ Ռեզա շահի ձգտումը երբեմն հասցնում էր նրան ծայրահեղությունների, որոնցից մեկն էր օպերայի կառուցումը: Չգտելով արդիականացնել երկիրը, նա տենչում էր հզորացնել այն և միաժամանակ թուլացնել հոգևորականության ազդեցությունը: Այդ նպատակով Ռեզա շահը փորձում էր «ոգեշնչել իրանցիներին՝ հիշեցնելով նրանց Իրանի փառավոր անցյալը, «Շահնամնի» հերոսներին, արիական ծագումը, որպեսզի նոր ավյունով և կյանքով լցնի ժողովրդին»⁵:

Ազգայնական շարժումն Իրանում չստացավ այն ուժը, որը ստացել էր Թուրքիայում, սակայն այն թողեց իր կնիքը երկրի և մարդկանց վրա⁶:

19-րդ դարում Պարսկաստանի կրթական համակարգն ամբողջությամբ դարձել էր հոգևորականության մենաշնորհը: Տարրական դպրոցները՝ մաթթաբները, որտեղ դասավանդում էին ցածրաստիճան հոգևորականները՝ ախունդները, գտնվում էին հոգևորականության ազդեցության ներքո՝ չենթարկվելով պետական կամ մասնագիտական վերահսկողության: Այդ ժամանակաշրջանում ուսուցման տվյալ ձևը բավականին մեծ եկամուտ էր ապահովում ախունդների համար, և այդ էր պատճառը, որ երկրով մեկ տարածվել էին մակթաբները: Մակթաբներում դասավանդվող առարկաներն ամբողջությամբ ցույց են տալիս 19-րդ դարի Պարսկաստանի վիճակը: Հիմնական առարկաներն էին գրելը, կարդալը, գեղագրությունը: Այնուհետև աշակերտներն անգիր էին անում պարսկաարաբական չափածո բառարանը (Նիսար), Ղուրանից հսկայածավալ հատվածներ: Առավել գնահատվում էին նրանք, ովքեր անգիր գիտեին ամբողջ Ղուրանը⁷:

Բացի մակթաբներից այդ ժամանակ Պարսկաստանում տարրական կրթության այլ օջախներ չկային: Միջնակարգ ուսուցումը ամբողջությամբ մասնավոր հիմքերի վրա էր: Ուսուցիչները հիմնականում աշխարհիկ գրագիրներ էին, ովքեր դասավանդում էին աշակերտի տանը: Ուսուցման հիմքն էին կազմում գեղագրությունը, դասական գրականությունը, արաբերենի քերականությունը, հազվադեպ անցնում էին տրամաբանություն, մաթեմատիկա և երաժշտություն⁸:

Նրանց համար, ովքեր չէին պատրաստվում հոգևորական դառնալ, կրթական գործընթացը սահմանափակվում էր այդքանով: Կենդանի էին մնացել միայն հիշողությունները երբեմնի չքնաղ՝ Նիշապուրի, Թավրիզի և Բաղդադի միջնադարյան իսլամական համալսարանների փառավոր անցյալի մասին:

Բարձագույն կրթության միակ օջախներն էին Ղոմի և Սպահանի հոգևոր դպրոցները՝ մեղրեսները, որտեղ հիմնական առարկաներն էին աստվածաբանությունն, արաբերենի քերականությունը, հռետորական արվեստը, իրավագիտությունը (շարիաթ և ֆիքհ), տրամաբանությունը, թվաբանությունն, աստղագիտությունը⁹։ Սակայն երիտասարդների զգալի մասի հիմնական նպատակը գիտելիքների հարստացումն էր, այլ ոչ թե հոգևորական դառնալը։ Այս միտումը էլ ավելի ուժեղացավ 19-րդ դարի վերջում։

Դեռևս 19-րդ դարի 1-ին կեսին Պարսկաստանում սկսվել էին կրթական բարեփոխումներ։ Իրանում արևմտյան տիպի դպրոցներ հիմնելու առաջին փորձերն իրականացվեցին 19-րդ դարի կեսերին օտարերկրյա միսիոներների կողմից։ Այդ դպրոցներ կարող էին հաճախել միայն քրիստոնյաները, սակայն շուտով առաջադեմ մահմեդականների երեխաները նույնպես օգտվեցին ընձեռնված հնարավորությունից։ Ժամանակի ընթացքում դրանք մեծ կարևորություն ձեռք բերեցին՝ դաստիարակելով մի նոր սերունդ, որի ներկայացուցիչներից շատերը Ռեզա շահի կառավարման շրջանում զգալի դեր խաղացին երկրի արևմտականացման գործում։ Մինչև 1929թ. Պարսկաստանում կար շուրջ 50 օտարերկրյա դպրոց, որոնցից 25 ամերիկյան միսիոներական դպրոցներ էին¹⁰։

1851թ. վարչապետ Միրզա Թաղի խանի նախաձեռնությամբ Թեհրանում հիմնվեց աշխարհիկ տիպի առաջին ուսումնարանը՝ Դարուֆունունը¹¹, որը համապատասխանում էր ֆրանսիական լիցեին՝ ներառելով միջնակարգ և տարրական բարձրագույն կրթությունը։ Կառավարության ջանքերով 19-րդ դարի 2-րդ կեսին բացվեց ևս 2 նմանատիպ դպրոց և 2 զինվորական քոլեջ։

1898թ. Իրանի կառավարությունը հիմնեց Ազգային դպրոցների խորհուրդ, որը ներառում էր ժամանակի աչքի ընկնող մարդկանց։ Նրանց ջանքերով էլ ամբողջ երկրով մեկ հիմնվեցին աշխարհիկ տարրական առաջին դպրոցները, որոնց ծրագիրը գրեթե չէր տարբերվում մակթաբների ծրագրից։

Բարեփոխումների երկրորդ փուլը սկսվեց 1906թ. Սահմանադրական հեղափոխությունից հետո, երբ երկրում ժամանակակից կրթական համակարգ հիմնելու ուղղությամբ իրականացվեցին չափավոր քայլեր։ 1910թ. Մեջլիսն ընդունեց Իրանի կրթության մասին օրենքը և ստեղծեց Կրթական գործերով նախարարություն, որի ամբողջական անվանումն էր «Կրթության, Վաքֆի և Գեղեցիկ արվեստների նախարարություն»¹²։ 1911թ. ընդունվեց կրթության մասին հիմնական օրենքը, որով էլ ուրվագծվեցին Իրանում ժամանակակից կրթական համակարգ հիմնելու ծրագրերը։ Սակայն երկրում հոգևորականության մեծ ազդեցության

պատճառով նախատեսվող բարեփոխումներն այդ շրջանում անիրականացանալի էին:

Երբ իշխանության գլուխ եկավ Ռեզա շահը, երկրի ազգային դպրոցներում (պետական և մասնավոր աշխարհիկ) ընդգրկված էր ընդամենը 10.000 ուսանող¹³:

Ռեզա շահն իշխանության առաջին տարիներին իր ուշադրությունը կենտրոնացրել էր երկրում ներքին անվտանգության հաստատմանը և բանակի վերակազմավորմանը: Դա էր հիմնական պատճառը, որ ազգային գործունեության այլ հարցերով զբաղվում էին ավելի ցածր դիրք գրավող անձինք: Այդ շրջանում Կրթության նախարարության կառուցվածքը փոփոխության գրեթե չէր ենթարկվել, և դրա ազդեցությունը կրթության ոլորտում աննշան էր: Ռեզա շահի հիմնական նպատակն էր ընդլայնել կրթական համակարգը, որպեսզի այն կարողանա բավարարել ամբողջ ազգի կարիքները: Այդ ծրագիրն ի կատար ածելու համար անհրաժեշտ էր ունենալ կենտրոնացված նախարարություն, որը կկարողանար իրականացնել լիարժեք հսկողություն կրթության բոլոր փուլերի վրա:

Դեռևս 1921թ. Կրթության նախարարությանն առընթեր ստեղծվել էր Կրթության գործերով զերագույն խորհուրդ, որի պարտականություններից էր Արևմտքի ուսումնական ծրագրերի լուրջ ուսումնասիրումը, ինչպես նաև իգական և արական մանկավարժական քոլեջների ծրագրերի պատրաստումը: Դա Պարսկաստանում պրոֆեսիոնալ ուսուցիչներ պատրաստելու առաջին քայլն էր: Այդ խորհրդի պարտականություններից էր նաև եկեղեցական միջոցներով ստեղծվող պետական դպրոցներին հատկացնելը, պետական միջոցների հաշվին Եվրոպա ուղարկվող ուսանողներին ընտրելը, ինչպես նաև Խորհրդին կից ենթակումիտե ստեղծելը, որը պետք է հետևեր մակթաբների գործունեությանը, սանիտարահիգիենիկ վիճակին, կարգապահությանը, իրականացվող բարեփոխումներին:

Իրանի կրթության մասին օրենքով նախատեսված չէր մանկապարտեզների հիմնադրումը, սակայն արդեն 1918թ. Թեհրանում բացվել էր առաջին մասնավոր, իսկ 1933թ.՝ պետական մանկապարտեզը: Այսուհետ մանկապարտեզները ներգրավվեցին կրթական համակարգի մեջ: Այնտեղ հաճախում էին 4-7 տարեկան երեխաներ. նրանք զբաղվում էին խաղերով, երգով, պարով, արտասանությամբ, անցնում էին թվաբանություն, իսկ վերջին տարվա ընթացքում՝ այբուբեն:

1921թ. Կրթության նախարարությունը կազմեց տարրական և միջնակարգ ուսուցման առաջին ամբողջական տասներկուամյա ծրագիրը, որն էլ իր հերթին բաժանվում էր երկու վեցամյա փուլերի՝ տարրական և միջին մակարդակների: Կրթության նախարարությունը 6-րդ, 9-րդ և 12-րդ տարվա վերջում քննություններ էր կազմակերպում: Լավագույն աշա-

կերտները վկայագրեր էին ստանում: 1927թ. Մեջլիսն օրենք ընդունեց պարտադիր և անվճար տարրական կրթության մասին, որը հիմնականում չիրագործվեց¹⁴: Տարրական դպրոցում անցնում էին պարսկերեն, արաբերեն, գեղագրություն, թվաբանություն, Պարսկաստանի պատմություն և աշխարհագրություն, ֆիզիկական կուլտուրա: Ռեզա շահի կառավարման շրջանում Իրանում տարածվեցին ընդհանուր դպրոցներ տղաների և աղջիկների համար, որոնց ուսումնական ծրագրերում կար ուղղակի տարբերություն: Աղջիկները չէին անցնում բոլոր նշված առարկաները՝ փոխարենը անցնելով կարուճակ և մկարչություն: 1936թ-ից ծրագրի մեջ մտցրեցին արվեստ և երաժշտություն¹⁵:

Միջնակարգ ուսուցումը, որը պարտադիր չէր, վճարովի էր, սակայն վարձը բավականին ցածր էր: Բացի այդ, ուսուցիչների, ցածրաստիճան պետական ծառայողների, ինչպես նաև լավ սովորող երեխաների համդեպ բացառություններ էին կիրառվում: Միջնակարգ ուսուցման վեցամյա ծրագիրը, որը բաղկացած էր երկու եռամյա փուլերից, բավականին ընդարձակ էր: Առաջին երեք տարիների առարկաները տղաների և աղջիկների համար նույնն էին. նրանք ուսումնասիրում էին Ղուրանը, արաբերեն, եվրոպական լեզու (սովորաբար ֆրանսերեն), մի շարք ճշգրիտ, հումանիտար և բնագիտական առարկաներ, ինչպես նաև հիգիենա: Տղաները անցնում էին նաև քիմիա, ֆիզիկա, իսկ առավել ընդունակները՝ նաև համրահաշիվ: Աղջիկներն այդ առարկաների փոխարեն անցնում էին տնտեսագիտություն, կարուճակ, երեխաների խնամք: Մակայն լաբորատոր պայմաններ չկային, և ուսուցումը հիմնականում տեսական բնույթ էր կրում: Հանգստի ժամերին աշակերտները զբաղվում էին խաղերով, երաժշտությամբ, և ներկայացումներ բեմադրելով¹⁶: Այս ծրագրից երևում է, որ Իրանի կրթական համակարգի հիմնական մպատակը երեխաներին որպես հասարակության լավ անդամ դաստիարակելն էր: Դիմելով Կոլումբիական մանակավարժական քոլեջին՝ կրթության այդ ժամանակվա մախարարը գրում էր. «Ավելի կարևոր է սովորեցնել, թե ինչպես է պետք ապրել, քան ուղղակի սովորեցնել գրագիտության տարրերը»¹⁷:

Միջնակարգ ուսուցման առաջին փուլի շրջանավարտները կարող էին ուսումը շարունակել ոչ միայն երկրորդ փուլում, այլև պետական տեխնիկական դպրոցներում: Վերջին երեք տարիների ընթացքում աշակերտները մասնագիտանում էին՝ բարձրագույն կրթօջախ ընդունվելու համար: Այսպիսով մոր ծրագիրն այն աստիճան գերծանրաբեռնված էր, որ ուսանողները չհասցնելով ընկալել իրենց համար նորը և օտարը՝ ստիպված էին լինում դիմել անգիր անելու հին մեթոդին: Դա էլ հմարավորություն չէր ընձեռնում նրանց անհատականության զարգացման, մտածելու, խնդիրները հասկանալու և դրանց լուծումը ինքնուրույն գտնելու համար:

Տարրական և միջնակարգ կրթության մոր ծրագիրն առաջ բերեց կրթված ուսուցիչների, որակյալ դասագրքերի, ուսուցման մոր մեթոդների անհրաժեշտություն:

Դեռևս 1918թ. Թեհրանում բացվել էր առաջին մանկավարժական քոլեջը՝ առանձին բաժիններով կանանց և տղամարդկանց համար: Մական այս ուղղությամբ ևս հիմնական քայլերը կատարվեցին Ռեզա շահի օրոք: 1929թ. Թեհրանի մանկավարժական քոլեջում սահմանվեց պետական կրթաթոշակ՝ տարեկան 15 կարիքավոր ուսանողների համար: 1934թ. ընդունվեց Ուսուցիչների պատրաստման օրենքը, ըստ որի 5 տարվա ընթացքում երկրում պետք է հիմնվեր 25 մանկավարժական քոլեջ: Մական արդեն 1939թ. դրանց թիվը գերազանցել էր նշվածից, իսկ Ռեզա շահի կառավարման վերջին տարվա ընթացքում այն անցնում էր 36-ից¹⁸: Այս օրենքն արտոնություններ էր շնորհում տվյալ քոլեջների շրջանավարտներին: Նոր սերնդի ուսուցիչները ոչ միայն ավելի բարձր աշխատավարձ էին ստանում, այլև ավելի մեծ հարգանք էին վայելում: Փոփոխություններ տեղի ունեցան նաև սոցիալական ոլորտում: Բարեփոխումների շնորհիվ մտավորականությունը հասարակության շերտից վերաճեց համեմատաբար հանգիստ, ապահով, հարգված սոցիալական դասի՝ կազմելով երկրի աշխատուժի մոտ 7%-ը¹⁹:

Ուշադրություն էին դարձնում դպրոցների սանիտարահիգիենիկ վիճակին, որը իրականացվում էր հատուկ կրթություն ստացած բժշկական սպաների կողմից:

1928թ. սկսած Կրթության նախարարությունը ձեռնամուխ եղավ դասագրքերի խնդրի լուծմանը: Այս ոլորտում զգալի էր ֆրանսիական ուսումնական մեթոդների, տեքստերի ազդեցությունը: Անգամ պարսից լեզվի այբբենարանները մշակվում էին ֆրանսիական օրինակով, իսկ պատմության, աշխարհագրության և այլ առարկաների դասագրքերը հաճախ ուղղակի թարգմանվում էին ֆրանսերենից: 1939թ. հրատարակվեցին մոր դասագրքեր, որոնք առաջին անգամ ներառում էին դպրոցական ծրագիրը մինչև միջնակարգ ուսուցման I-ին փուլը:

Պետական դպրոցների հետ մեկտեղ երկրում գոյություն ունեին մասնավոր դպրոցներ, որոնք հիմնադրվել էին օտարերկրյա միսիոներների կամ կրոնական փառամասնությունների կողմից, ինչպիսիք էին հայերը, հրեաները, քախայիները, զրադաշտականները: Հայկական և հրեական դպրոցների աշակերտները միայն տվյալ համայնքների անդամների երեխաներն էին, իսկ քախայական, զրադաշտական կամ միսիոներական դպրոցներ հաճախում էին բոլոր ցանկացողները: Ի շնորհիվ օտարազգի կրոնակիցների հետ ունեցած կապերի՝ այս դպրոցները մեծ հեղինակություն էին վայելում: Օրինակ՝ չնայած քախայիների հանդեպ պաշտոնական ճնշմանը, Թեհրանում քախայիների դպրոց էին հաճախում առա-

ջաղեմ և ազդեցիկ ընտանիքների երեխաներից շատերը, այդ թվում նաև Ռեզա շահի ավագ դստերը և թագաժառանգը²⁰։

Պետական քաղաքականությունը մասնավոր դպրոցների հանդեպ համապատասխանում էր Ռեզա շահի ազգայնական, կենտրոնացման՝ իրանիզացիայի ծրագրերին։ Կառավարությունը սկզբում վարում էր հանդուրժողական քաղաքականություն այդ դպրոցների հանդեպ՝ որոշ դեպքերում անգամ հովանավորելով դրանց։ Սակայն 1927թ. սկսվեց շարժում բոլոր մասնավոր դպրոցները վերահսկողության տակ վերցնելու ուղղությամբ։ Թերթերը մեղադրում էին դրանց իսլամի հիմքերը խաթիսելու և ուսանողների շրջանում «իրանական ամեն ինչի հանդեպ արհամարհանքի» զգացում դաստիարակելու մեջ²¹։ 1928թ. սեպտեմբերի 5-ին Կրթության նախարարության հրամանով բոլոր ամերիկյան միսիոներական դպրոցները մտցվեցին Կրթության նախարարության հսկողության ներքո։ Դրանք պետք է հետևին նախարարության մշակած ծրագրերին, դասավանդումը պետք է անցկացվեր միայն պարսկերեն լեզվով։ Իսկ բարձր դասարաններում մահմեդական կրոն դավանող երեխաներին արգելվում էր Աստվածաշունչ կարդալը։ 1940 թ. Կրթության նախարարության ազգայնական քաղաքականության հետևանքով միսիոներական դպրոցները վերածվեցին պետական դպրոցների, իսկ դրանց ուսուցիչներին «խնդրեցին» հեռանալ երկրից։ Սկզբում այդ ճակատագրից խուսափել էին քրիտանական միսիոներական դպրոցների ուսուցիչները՝ համաձայն Իրանի և Բրիտանիայի արտաքին գործերի նախարարների միջև եղած պայմանավորվածության, ըստ որի «այդ արժանի տղամարդկանց և կանանց թույլ է տրվում կատարել իրենց մարդասիրական և կրթական գործունեությունը՝ պայմանով, որ նրանք չեն խառնվի Իրանի հասարակական կարգերին, օրենքներին և կանոններին»²²։ Սակայն հետագայում դրանք ևս փակվեցին։ Իրանի կառավարությունը նման քաղաքականությունը բացատրում էր այն հանգամանքով, որ եթե քրիտանական և ամերիկյան դպրոցները շարունակեն իրենց գործունեությունը, ապա ժուռները ևս կցանկանան բացել ազգային դպրոցներ։

Նմանատիպ քաղաքականություն էին վարում նաև պարսկական մասնավոր դպրոցների հանդեպ, որի հետևանքով 1930թ. հոկտեմբերին այն դպրոցները, որոնք «համապատասխանում էին նախարարության ակադեմիական և բարոյական չափանիշներին» ստացան պետական կարգավիճակ, իսկ այդ չափանիշներին չհամապատասխանող դպրոցները ավարտեցին իրենց գործունեությունը, քանի որ դրանց դիպլոմները և վկայագրերը արժեք չունեին։ Դրան հետևեց 1934թ. հոկտեմբերին բահայիների դպրոցների փակումը։ Հայկական դպրոցները սկզբում կորցրեցին եվրոպական լեզուներ դասավանդելու, իսկ 1938թ.՝ նաև գործունեության իրավունքը²³։ Այս ամենը կատարվում էր կրոնական փոքրա-

մասնություններին միաձուլելու մպատակով, որը Ռեզա շահի ազգայնական քաղաքականության հիմքերից էր:

Կարևոր նվաճումներից էր երկրում տարրեր մախարարությունների կողմից տեխնիկական դպրոցների հիմնումը, որոնք պատրաստում էին բարձրորակ մասնագետներ տվյալ մախարարությունների համապատասխան բաժինների համար: 1922թ. պարսկական կառավարության մեծածավալ օգնության շնորհիվ՝ գերմանացիները Թեհրանում բացեցին առաջին անկախ ճարտարագիտական դպրոցը, որը հետագայում վերաճեց իրանագերմանական արտադրական դպրոցի: Նշանակալի է որ, երբ 1940թ. Կրթության մախարարությունը փակեց բոլոր օտարերկրյա դպրոցները, այն խուսափեց այդ ճակատագրից: 1923թ-ից սկսած արտադրական բնույթի ցանկացած պայմանագիր արտասահմանացիների հետ ենթադրում էր տվյալ ոլորտի տեխնիկական ուսուցման ապահովում իրանցիների համար²⁴: Տեխնիկական դպրոցներ էր բացել նաև Անգլո-իրանական մավթային ընկերությունը, որոնց շրջանավարտները պետք է ավարտելուց հետո աշխատեին ընկերությունում: Սակայն նրանցից շատերը իրենց կենցաղն ապահովելու համար բացում էին փոքրիկ արհեստանոցներ և ստացած գիտելիքները կիրառում այնտեղ:

1930-ական թթ. հիմնեցին Երաժշտական և Գեղեցիկ արվեստների ակադեմիաները: Գեղեցիկ արվեստների ակադեմիան իր ուշադրությունը կենտրոնացնում էր պարսկական արվեստների և արհեստների վերականգմանը՝ գորգագործությանը, մանրանկարչությանը, խճանկարին: Իսկ Երաժշտական ակադեմիան Արևմուտքի ազդեցության տարածման օղակ էր:

Պետական կրթության զարգացումը ի վերջո ունեցավ տրամաբանական շարունակություն, երբ 1934թ. մայիսին ընդունվեց Իրանում համալսարան հիմնելու մասին օրենքը²⁵: Համալսարանի հիմնաքարը դրվեց 1935թ փետրվարի 5-ին Ռեզա շահի կողմից: Ամեն տարի այդ օրը տոնվում էր որպես կրթության և ծառատունկի փառատոն: Համալսարանը համեմատաբար անկախ ինստիտուտ էր, ղեկավարվում էր մախագահի, փոխմախագահի, բաժինների կամ ֆակուլտետների ղեկավարների և դասախոսների մասնակցությամբ կազմված խորհրդի կողմից: Սակայն Կրթության մախարարությունն էր զբաղվում պաշտոնների նշանակմամբ, աշխատավարձի, ուսումնական ծրագրերի և այլ խնդիրների կարգավորմամբ: Ռեզա շահի հրաժարական տալուց մեկ տարի անց Մեջլիսը, հանելով Համալսարանը կրթության մախարարության վերահսկողությունից, այն դարձրեց լիակատար անկախ մարմին, որը հետագայում դարձավ քաղաքական ըմբոստությունների օջախ: Համալսարանում կար հինգ ֆակուլտետ՝ արվեստի, բնագիտական, բժշկական, իրավաբանական և ճարտարագիտական²⁶: Հոգևորականության ուժը թուլաց-

նելու համար Ռեզա շահը մի խումբ առաջադեմ և գիտակ մայլաների հետ Համալսարանում ստեղծեց Աստվածաբանության ֆակուլտետ, որը գտնվում էր Թեհրանի Մեփահսալար մզկիթում: «Այդ ժամանակվանից բոլոր երիտասարդ հոգևորականները պետք է ներկայանային կրթված աստվածաբանների խորհրդին և քննություն հանձնեին, որպեսզի որակավորվեին՝ իրենց հոգևորական գործունեությունը շարունակելու համար: Մակայն դրանց մակարդակը այնքան ցածր էր, որ թեկնածուների 90%, տապալելով քննությունները, ստիպված եղավ մոր մասնագիտություն ընտրել: Այսուհետ Իրանի քաղաքներն ու գյուղերն ազատվեցին հոգևորական խաբեբաններից»²⁷: Հետագայում, արդեն գոյություն ունեցող Գեղեցիկ արվեստների և Գյուղատնտեսական քոլեջները մտցվեցին Համալսարանի կազմի մեջ, որի դասախոսները հիմնականում կրթություն էին ստացել Եվրոպայում: Կային նաև զգալի քանակությամբ արտասահմանցի դասախոսներ: Առաջին տասնամյակում Թեհրանի համալսարան ընդունվեցին ուսանողներ Հնդկաստանից, Աֆղանստանից, Թուրքիայից և Նորբերդային Միությունից: Արդեն 1941թ. Համալսարանի 11 ինստիտուտներում գրանցված էր 3.300 ուսանող²⁸:

Մակայն գրագիտության, ակադեմիական ընդհանրության և մտավոր կարգապահության ավանդույթները դեռևս արմատավորված չէին երկրում: Դա էր պատճառներից մեկը, որ Համալսարանը բավականին մակերեսային բնույթ էր կրում: Դասախոսները կարդում էին դասախոսություններ, ուսանողները բառ առ բառ գրանցում դրանք, իսկ քննությանը ընդամենը վերարտադրում ամօգիր արած նյութը: Համալսարանի գրադարանները սովորաբար դատարկ էին:

Արևմտաքի ազդեցությունն ընկալելու և հետո ներմուծելու գործում առավել մեծ հնարավորություն ունեին արտասահմանում սովորող երիտասարդները: Դեռևս 19-րդ դարում մի շարք ուսանողներ մեկնել էին Եվրոպա՝ զինվորական կրթություն ստանալու նպատակով: Եվ քանի որ արդիականացված երկրի պահանջները հոգալու համար կարևոր էր ունենալ լավ կրթված և բարձր որակավորում ունեցող՝ մեծ քանակությամբ մասնագետներ, 1928թ. Մեջլիսը միջոցներ տրամադրեց տարեկան 100 ուսանող Եվրոպա և ԱՄՆ ուղարկելու համար: Այդ միջոցների 35% նախատեսված էր մանկավարժական գիտություններով զբաղվող ուսանողների համար²⁹: 1940թ. հրապարակված թվերը ցույց են տալիս, որ այդ շրջանում 432 շրջանավարտ արդեն վերադարձել էր արտասահմանից, իսկ 452 դեռ շարունակում էին իրենց ուսումը: Այս թվերը ներառում են միայն Կրթության նախարարության հովանավորությամբ արտասահմանում սովորողներին: Եթե հաշվի առնենք նաև այլ նախարարությունների հովանավորությամբ արտասահմանում սովորողներին, ապա նրանց թիվը 1922-38թթ. կկազմի շուրջ 1500 հոգի, որոնց մեծ մասը գրանցված էր

Ֆրանսիայի բարձրագույն կրթության օջախներում: Չգալի էր նաև Բեյ-րութի Ամերիկյան համալսարանում և Կոնստանդնուպոլսի Ռոբերտ ըն-լեջում սովորողների թիվը³⁰: Մեծ էր արտասահմանում կրթություն ստա-ցած ուսանողների դերը երկրի զարգացման գործում: Սակայն այդ ուսա-նողները վերադառնալով չէին կարողանում հարմարվել հին պայմաննե-րին և իրականացնել ստացած գիտելիքները այնպես, ինչպես նախա-տեսված էր, քանի որ այդ գիտելիքները հիմնված էին տեխնոլոգիապես առաջադեմ, բարձր արտադրողական երկրների պահանջարկի վրա:

1935թ. մարտին հիմնվեց Իրանի գիտությունների ակադեմիան («Ֆարհանգեսթան»), որի խնդիրներից էր պարսկերեն լեզուն օտար բա-ռերից (մասնավորապես արաբերեն, որը բառապաշարի մոտ 70% էր կազմում) մաքրելը և ժամանակակից լեզվական բառարան կազմելը³¹:

Իրանում ժամանակակից գրադարանները հայտնվել են 1920-1930-ական թթ., որոնցից խոշորագույնն էր «Ազգային գրադարանը», որը հիմ-նադրվել էր 1937 թվին³²:

Անչափ կարևոր էին նշված ժամանակաշրջանում կատարված բարե-փոխումները երկրի մեծահասակ բնակչության կրթության գործում: Այս ուղղությամբ ծրագրեր մշակվել էին դեռևս Սահմանադրական հեղափո-խությունից հետո, սակայն դրանք երբեք չեն իրագործվել: Ռեզա շահը գիտակցում էր, որ մեծահասակների կրթական մակարդակի բարձրա-ցումը կնպաստի իր՝ բարեփոխումների և արդիականացման ծրագրի ի-րականացմանը: Եվ արդեն 1936-1937 ակադեմիական տարվա սկզբում մեծահասակների համար ամբողջ երկրով մեկ բացվեցին 1500 երեկոյան դպրոցներ, որոնք 2 տիպի էին՝ լրիվ անգրագետների և կիսագրագետնե-րի համար: Հետագայում դրանց թիվը զգալիորեն ավելացավ՝ հասցնելով ընդհանուր ծախսերը 1.607.327 ռիալի³³: Այդ դասընթացները պարտա-դիր էին պետական գրասենյակների անգրագետ և կիսագրագետ աշխա-տակիցների համար: Կրթության նախարարությունը նշում էր, որ մեծա-հասակների ուսուցման երկամյա ծրագիրը հետապնդում է 2 նպատակ՝ պայքարել անգրագիտության դեմ և մեծահասակներին ապահովել լավ քաղաքացի լինելու համար անհրաժեշտ անհատական և սոցիալական գիտելիքներով: Կառավարությունն ամեն կերպ աջակցում էր այս ծրագ-րի իրականացմանը: Տարրական ուսուցման ծրագրի հաջողությունը հանգեցրեց 1937թ. սկզբին մեծահասակների համար 22 միջնակարգ դպրոցի բացմանը, որոնց ուսումնական ծրագիրը համապատասխանում էր սովորական միջնակարգ դպրոցների ծրագրին: Այնտեղ կարող էին հաճախել նաև այն երիտասարդները, ովքեր տարբեր պատճառներով չէին հաճախում ցերեկը: 1940թ. արդեն նման դասարանների թիվը հաս-նում էր 2.133, աշակերտներինը՝ 157,197: Այս դասընթացներին մասնակ-

ցում էին 18 տարեկանից բարձր տարրեր մասնագիտության տեր մարդիկ³⁴:

Մեծահասակների կրթության ծրագրի հաջողությամբ ոգևորված՝ Կրթության նախարարությունը 1939թ հունվարին ստեղծեց Ջանգվածային լուսավորության բաժին, որի կազմի մեջ էին Համալսարանի, մեծահասակների դպրոցների դասախոսներ, սկսնակական շարժման առաջնորդներ, զանգվածային լրատվության միջոցների ներկայացուցիչներ և այլն: Նրանք անվճար դասախոսություններ էին կարդում տարբեր թեմաների շուրջ: 1940-41թթ. կազմակերպվեցին 700-ից ավելի դասախոսություններ, որոնց մասնակցեցին մոտ 1.500.000 մարդ: Այդ դասախոսությունների հիմնական նպատակը ազգային ոգու հզորացումն էր, որն էլ ենթադրում էր ուշադրություն ժողովրդի հանդեպ: Այդ մասին է շեշտել Ռեզա շահը 1940թ. հունիսի 29-ին լրագրողների հետ ունեցած ասուլիսում. «Իրանը չի կարող զերծ մնալ կատարվող իրադարձություններից, ժողովուրդն էլ ոչ միայն պետք է տեղյակ լինի ազգային և համաշխարհային հարաբերությունների մասին, այլև պետք է սովորի ինքը հասկանա և մեկնաբանի դրանք»:

Ռեզա շահի իշխանության օրոք քայլեր ձեռնարկվեցին նաև մարզական ավանդույթները վերականգնելու ուղղությամբ: 1933թ. Կրթության նախարարությանն առընթեր թագաժառանգի նախագահությամբ հիմնվեց Ֆիզիկական դաստիարակության խորհուրդ, որը կազմակերպում էր ոչ միայն միջդպրոցական, այլև համազգային ատլետիկ մրցումներ: Վերականգնվում էին մարզական հին ավանդույթները, ինչպես նաև ընդօրինակվում էին նոր եվրոպական մարզաձևեր: 1936թ. վերադառնալով Շվիցարիայից՝ թագաժառանգը ստանձնեց բոլոր սպորտային միությունների և սկսնակական շարժման պատվավոր նախագահի պաշտոնը՝ մեծապես նպաստելով սպորտի զարգացմանը: Առաջին սկսնակական կազմակերպությունն Իրանում ստեղծվել է դեռևս 1925թ., որը հետագայում միացել է միջազգային կազմակերպությանը: Նշանակալից է, որ սկսնակական շարժմանը մասնակցում էին նաև աղջիկներ: 1940թ. Իրանում արդեն կար 21.000 սկսնակ³⁵: Ֆիզիկական դաստիարակությունը և սկսնակական շարժումը մտցվեցին դպրոցական պարտադիր ծրագրի մեջ: Այն ժամանակ սկսնակական շարժումը ռազմականացված էր, և 10-12-րդ դասարանների տղաները պետք է շաբաթական 4 ժամ զինվորական պարապմունքներ ունենային, որն իրականացվում էր բանակի սպաների օգնությամբ:

Բացի այն, որ ժամանակակից կրթական համակարգ հիմնելը հզոր խթան էր երկրի արդիականացման համար, Ռեզա շահի կրթական քաղաքականությունը ունեցավ ևս երկու ազդեցություն հասարակության վրա. առաջինը՝ կրթությունը մինչ այդ հոգևորականության մենաշնորհն

էր, իսկ մօր կրթական համակարգը թուլացրեց հոգևորականության ուժը, երկրորդը՝ այն գաղափարը, որ կրթությունը միայն տղաների մենաշնորհը չէ, հիմք դրեց կանանց սոցիալական էմանսիպացիային³⁷:

Շահն ուզում էր տեսնել Իրանն անկախ, սակայն մա հարգում էր արևմտյան քաղաքակրթության ստեղծածը և ցանկանում էր օգտագործել այն ի բարօրություն իր երկրի: Շահը կարծում էր, թե հմարավոր էր արևմտյան քաղաքակրթության ստեղծածը հաջողությամբ փոխադրել Իրան՝ առանց պարարտ հող մախապատրաստելու: Արդյունքում Իրանի կրթական մօր համակարգը ձևավորվեց ֆրանսիական օրինակի զգալի ազդեցությամբ, որն էլ խոչընդոտում էր սեփական մտքերի զարգացմանը և չէր համապատասխանում երկրի ավանդույթներին և ստեղծված իրականությանը: Բացի այդ, ինչպես Թուրքիայում, այնպես էլ Իրանում արևմտականացումը կատարվում էր վերևից ներքև: Օրինակ՝ ավելի մեծ ուշադրություն էր դարձվում բարձրագույն, քան տարրական կրթությանը: Մակայն դա էլ բխում էր մօր ճեժիմի պահանջներից³⁸:

Չմայած, որ 1925-1941թթ. ընթացքում կրթության զարգացմանը մախատեսված ծախսերը աճել էին մոտավորապես 12 անգամ, սակայն երկրի ընդհանուր ծախսերից կրթությանը բաժին էր հասնում միայն 4%: Այս թիվը չնչին էր բանակին հատկացված միջոցների համեմատ: Այդուհանդերձ կրթության ծախսերը՝ ներառած պետական և մասնավոր գումարները և եկեղեցական մվիրատվությունները, կազմում էին 2-3 մլն. ռիալ, համեմատած 1925թ-ի 100.000-ի հետ: Ներկայացնենք հետևյալ թվերը, որպեսզի ի մի բերենք բարեփոխումների արդյունքները կրթության ոլորտում: 1922-1940թթ. ընթացքում դպրոցների թիվը 612-ից աճել էր 8.237, աշակերտներինը հասել էր 496.960, ուսուցիչներինը՝ 13,646: Մեղրեսներում սովորողների թիվը 5.984-ից կտրուկ մվազել էր 785: 1940թ. 411 հոգի ավարտեց Թեհրանի համալսարանը, այն դեպքում, երբ 1922թ. բարձրագույն աշխարհիկ կրթություն ստացել էր ընդամենը 15 հոգի՝ ավարտելով Դարուֆունունը³⁹:

Գնահատելով Ռեզա շահի իշխանության օրոք Իրանում տեղի ունեցած կրթական բարեփոխումները և Արևմուտքի ազդեցության աստիճանը այդ գործընթացում՝ պետք է հավասար ուշադրություն դարձնել կատարված մօրամօրություններին և մերժված սկզբունքներին: Անկասկած, հոգևորականությունը մշանակալիորեն կորցրեց իր ազդեցությունն ազգի կրթության գործընթացում: Մակայն մօր համակարգը, ներմուծվելով չափազանց հապճեպ և մակերեսորեն ընդօրինակելով եվրոպական քաղաքակրթության՝ դարերի ընթացքում ստեղծած մվաճումները, ի վիճակի չեղավ դամալու աստիճանական ասջընթացի բաղկացուցիչ մաս և պահպանելու հնի և մօրի հաշվեկշիռը:

Չնայած, որ բարեփոխումներն իրականացվեցին հիմնականում մայրաքաղաքում և խոշոր քաղաքներում, որտեղ զգալի էր արևմուտքի ազդեցությունը, այնուամենայնիվ, Ռեզա շահի եռանդի շնորհիվ էր, որ Իրանում հիմք դրվեց պետական կրթության աշխարհիկ համակարգին⁴⁰, որը հանգեցրեց համեմատական, սակայն, այնուամենայնիվ, հաջողության: Այսպիսով Ռեզա շահի կառավարման շրջանը կարելի է բնորոշել որպես փորձարկումների և ուսումնական ծրագրերի աստիճանական ներմուծման, այլ ոչ թե անհապաղ նվաճումների ժամանակաշրջան:

STEPANYAN LUSINE

**EDUCATIONAL REFORMS DURING THE REIGN OF
REZA SHAH PAHLAVI
(Summary)**

After centuries of cultural, social, political and economic decline education in Iran in 19-th century had come to be the monopoly of clergy. At the end of the 19-th century and after the Constitutional Revolution there have been made some temperate attempts to create in Persia an organized contemporary educational system. But most reforms have been made during the reign of Reza Shah Pahlavi. Due to his customary vigour and dispatch a modern secular educational system was established in Persia. Although it did not become a constituent part of gradual evolution, we can summarize the steps for the advancement of education as sending of hundreds of students to Europe and America, the improvement and expansion of elementary and secondary schools, the founding of University of Tehran, the introduction of physical education and scouting in all schools, the erection of modern school buildings, stadiums and playgrounds, the foundation of teacher's colleges in the capital and the provinces, and the introduction of technical and adult education.

ԾԱՆՈԹԱԳՐՈՒԹՅՈՒՆՆԵՐ

1. Peter Avery, Modern Iran, London, 1965, p. 279.
2. Banani Amin, Modernization of Iran: 1921-1941, Stanford, California, 1961, p. 109.
3. Brigadier-General Sir Percy Sykes, History of Persia, London, 1951, Volume 2, p. 552, Sh'u GwL Lewis V. Thomas and Richard N. Frye, The United States and Turkey and Iran, Cambriedge, Massachussets, 1952, p. 223, Joseph. M.Upton, The History Of Modern Iran: An Interpretation, Cambriedge, Massachussets, 1965, p. 62.
4. Elwell-Sutton, Modern Iran, London, 1941, p. 121.
5. George Lenczowski, Iran Under The Pahlavis, Stanford, California, 1978, p. 80.
6. Lewis V. Thomas and Richard N. Frye, The United States and Turkey and Iran, p. 222.
7. Banani Amin, Modernization of Iran, p. 87.

8. Ibid., p. 88.
9. Աստղագիտություն անցնում էին օրացույցը կարգավորելու և պատճառն աղոթքը ժամանակին կատարելու նպատակով:
10. Banani Amin, *Modernization of Iran*, p. 89.
11. Վահան Բալթուրդյան, Իրանն այսօր, Երևան, 1999թ., էջ 217.
12. Elwell-Sutton, *Modern Iran*, p. 121.
13. Banani Amin, *Modernization of Iran*, p. 91.
14. Иран: Очерки новейшей истории, Москва, 1976г., стр. 77.
15. Banani Amin, *Modernization of Iran*, p. 93, Sh'u նաև Elwell-Sutton, *Modern Iran*, p. 135, Peter Avery, *Modern Iran*, p. 276.
16. Ibid., p. 93, Sh'u նաև Elwell-Sutton, *Modern Iran*, p. 135, Peter Avery, *Modern Iran*, p. 276.
17. Banani Amin, *Modernization of Iran*, p. 110.
18. Ibid., p. 93, Sh'u նաև Peter Avery, *Modern Iran*, p. 276.
19. Իրոանդ Աբրահամյան, Իրան Բին Դու Անգլաբ, Երևան, 2001թ., Վ. 133.
20. Banani Amin, *Modernization of Iran*, p. 94.
21. Иран: Очерки новейшей истории, стр. 78., Sh'u նաև Banani Amin, *Modernization of Iran*, p. 96.
22. Peter Avery, *Modern Iran*, p. 277-278.
23. Իրոանդ Աբրահամյան, Իրան Բին Դու Անգլաբ, Երևան, 2001թ., Վ. 133.
24. Banani Amin, *Modernization of Iran*, p. 98.
25. George Lenczowski, *Iran Under The Pahlavis*, p. 90.
26. Elwell-Sutton, *Modern Iran*, p. 137, Sh'u նաև Banani Amin, *Modernization of Iran*, p. 98., Իրոանդ Աբրահամյան, Իրան Բին Դու Անգլաբ, Երևան, 2001թ., Վ. 133.
27. George Lenczowski, *Iran Under The Pahlavis*, p. 306.
28. Իրոանդ Աբրահամյան, Իրան Բին Դու Անգլաբ, Երևան, 2001թ., Վ. 133.
29. Joseph. M.Upton, *The History of Modern Iran*, p. 54, Sh'u նաև Иран: Очерки новейшей истории, стр. 77.
30. Իրոանդ Աբրահամյան, Իրան Բին Դու Անգլաբ, Երևան, 2001թ., Վ. 133.
31. Elwell-Sutton, *Modern Iran*, p. 151, Sh'u նաև М.С. Иванов, *Очерк истории Ирана*, АН СССР, 1952г., стр. 323.
32. Վահան Բալթուրդյան, Իրանն այսօր, էջ 235.
33. Banani Amin, *Modernization of Iran*, p. 103-104, Sh'u նաև Elwell-Sutton, *Modern Iran*, p. 143.
34. Ibid., p. 105, Sh'u նաև Elwell-Sutton, *Modern Iran*, p. 143.
35. Elwell-Sutton, *Modern Iran*, p. 147.
36. Banani Amin, *Modernization of Iran*, p. 107.
37. George Lenczowski, *Iran Under The Pahlavis*, p. 90.
38. Ibid., p. 306.
39. Banani Amin, *Modernization of Iran*, p. 108, Sh'u նաև Elwell-Sutton, *Modern Iran*, p. 142., Իրոանդ Աբրահամյան, Իրան Բին Դու Անգլաբ, Երևան, 2001թ., Վ. 133.
40. George Lenczowski, *Iran Under The Pahlavis*, p. 90.